

DRŽAVNA OZNAKA KVALITETA (*National Quality Label – NQL*)

Oznaka kvaliteta je priznanje učesnicima eTwinning portala i školama za izuzetan nivo učestvovanja na eTwinning portalu. Za učenike ona može biti podsticaj i nagrada za uloženi trud, a za škole – javno priznanje za kvalitet rada i otvorenost prema saradnji na evropskom nivou. Oznake kvaliteta mogu biti državne ili evropske. Nagrađeni projekti i učesnici dobijaju elektronski certifikat kao potvrdu kvaliteta.

Procedura prijave za Državnu oznaku kvaliteta

- Prijavite se na korisnički nalog i kliknite na eTwinning live
- Kliknite na „Projekti“.
- Ispod projekta koji želite da prijavite kliknite na link „Prijavite se za oznaku kvaliteta“.
- Unesite informacije o svom projektu i pratite dalja uputstva.

Broj projekata koji se mogu prijaviti za Državnu oznaku kvaliteta nije ograničen.

DSP primjenjuje pet specifičnih minimalnih zahtjeva za dodjelu oznake kvaliteta određenom projektu. Potrebno je zadovoljiti svih pet uslova.

Pet uslova:

1. Projekt treba imati zajedničke ciljeve i zajednički plan.
2. Projekt treba biti završen ili biti u završnoj fazi.
3. Nastavnik koji se prijavljuje treba značajno doprinijeti projektu.
4. Treba postojati određen nivo saradnje na projektu.
5. Projekt treba biti vidljiv.

Kada se ispuni ovih pet uslova, projekt se ocjenjuje prema šest kriterija.

Koji su to kriteriji? Projekt treba postići opći nivo izvrsnosti u sljedećim oblastima:

1. Pedagoška inovativnost
2. Integriranost u kurikulum/NPP
3. Komunikacija i razmjena između partnerskih škola
4. Saradnja između partnerskih škola
5. Upotreba tehnologije
6. Rezultat, uticaj i dokumentacija

Za školsku 2017/2018. godinu, **rok za podnošenje prijava za eTwinning Državnu oznaku kvaliteta u BiH je 30. juni 2018. godine.**

eTwinning tim Državne službe za podršku organizuje niz aktivnosti u cilju pružanja podrške članovima eTwinning portala koji žele da podnesu prijave za Državnu oznaku kvaliteta.

“Professional Development Workshop za eTwinning ambasadore”

4. – 6. 6. 2018. godine, Hotel Metropol Palace, Beograd, Srbija



eTwinning ambasadori su jedan od najvažnijih segmenata eTwinning zajednice. Zajedničkim radom sa Državnom službom za podršku (NSS) u svojoj zemlji osiguravaju razvoj vještina i novih informacija koje su im potrebne za promociju eTwinning-a i održavanje treninga za nastavnike.

Radionice za profesionalni razvoj (Professional Development Workshops – PDW) za eTwinning ambasadore je događaj koji zajednički organizuju Državna služba za podršku jedne zemlje i Centralna služba za podršku (CSS) i ima za cilj pružanje i osiguranje širokog spektra znanja, informacija, inovacija, kao i jačanje ambasadora za efikasnije obavljanje njihovih zadataka.

PDW kroz plenarne sesije i radionice pruža eTwinning ambasadorima mogućnosti profesionalnog razvoja vještina koje su im potrebne u svakodnevnom nastavničkom radu, a naročito u treninzima sa drugim nastavnicima. Imaju priliku umrežavanja sa drugim kolegama, iz različitih zemalja, poboljšanja saradnje, razmjene dobrih praksi i razvoja ideja koje će na kraju realizovati u svom radu.



Ovogodišnji PDW 2018 organizovan je u Beogradu, Srbija, u saradnji sa eTwinning Državnom službom za podršku BiH i na njemu je učestvovalo oko 160 učesnika iz 37 zemalja.

Azra Šošeimala, eTwinning ambasadorica iz Bosne i Hercegovine, imala je ulogu ekspertice, te je vodila radionicu pod nazivom „Twinspace i komunikacija sa partnerima“ (*Twinspace and communication with partners*) s ciljem da pruži jasniju sliku kako organizovati TwinSpace u svrhu poboljšanja komunikacije sa partnerima.



Putovanje // Obilježimo Međunarodni dan broja π (pi) - Italija //

Jedanaest učenika i učenica JU Gimnazija Dobrinja nalazi se među 5000 mladih iz cijele Europe koji su u 2017. godini dobili nagradu Evropske inicijative "Move2Learn, Learn2Move".

Naime, projekt naših učenika "Obilježimo Međunarodni dan broja π (pi)", koji je realizovan u toku prošle školske godine u saradnji sa mnogim školama iz Bosne i Hercegovine i regionala, jedan je od nagrađenih u Evropi. Osim toga, naši učenici su prvi, i dosad jedini, iskoristili ovakvo putovanje kao nagradu.

Nagrađeni su učenici i učenice IV₂ razreda matematičkog smjera sa svojom profesoricom matematike Sanjom Šober Vojinović. To su: Armin Begić, Haris Deleut, Elmar Delić, Jasmin Džubur, Amer Mehmedić, Narda Brodović, Sven Stević, Emina Redžepagić, Naida Omerhodžić, Vildana Pajević i Orhan Smajović.



Nakon što smo obaviješteni da smo dobili nagradu, odlučili smo da želimo posjetiti Rim. Inicijativa nam je odobrila tu destinaciju, pa smo napravili plan putovanja sa sljedećim ciljevima:

- Upoznavanje sa kulturnim, prirodnim i historijskim obilježjima Rima i Italije;
- Razvijanje prijateljstva i zajedništva među učenicima;
- Snalaženje i orientacija u prostoru;
- Popularizacija sredstava javnog prevoza, posebno onih sa niskom razinom emisije CO₂.

Inicijativa "Move2Learn, Learn2Move" poslala nam je putne karte za Rim. Na put smo krenuli u četvrtak, 26. aprila, a vratili se u Sarajevo u ponedjeljak, 30. aprila 2018. Do Rima smo putovali autobusima i brodom, a nazad autobusom i avionom.

Odsjeli smo u hostelu Beautiful, u centru Rima. Posjetili smo razne znamenitosti Rima (Trastevere, Fontana di Trevi, Španske stepenice, Piazza Navona, Vatikan, Piazza del Popolo, Pantheon, Koloseum, Vittoriano...) Bilo je to nezaboravno iskustvo.



Svi ciljevi su u potpunosti ispunjeni, pa i više od toga. Najbitnije je sticanje iskustva. Meni, kao profesoru, najviše se sviđa to što se putuje manje uobičajenim načinom, jer djeca su navikla na udobnost automobila svojih roditelja. Ovako, sve je ličilo na avanturu, a u takvim situacijama se stiču najdragocjenija iskustva i stvaraju najjača prijateljstva i najljepše us-pomene.

Nabolje o tome svjedoče utisci učenika i učenica:

Sven Stević: "Svako treba posjetiti Rim barem jednom u životu. Hodajući Rimom osjeti se ta antička atmosfera koja nam govori da je ovaj grad bio jednom od prijestolnica svijeta i da svaki kamen ima svoju priču koja traje vijekovima."



Haris Deleut: "Rim je jedan od najljepših gradova u kojima sam bio. Uz dobru ekipu i organizaciju uspjeli smo vidjeti sve najvažnije znamenitosti ovog vječnog grada. Jedina mana je to što smo kratko ostali."



Emina Redžepagić: "Ovo je bilo jedno od boljih putovanja provedenih sa još boljim prijateljima. Rim je stvarno lijep grad i maksimalno smo iskoristili vrijeme provedeno u Rimu."



Amer Mehmedić: "Rim je predivan grad. Nažalost, naše putovanje nije trajalo dovoljno dugo da se u potpunosti upoznamo sa ovim čuvenim gradom. Ono što jesmo vidjeli će ostati u lijepom sjećanju. Vidjeli smo poznate građevine poput Koloseuma, Pantheona, Vatikana i Fontane di Trevi. Pokušali smo da vidimo što više i da napravimo što više fotografija za vrijeme naše kratke posjete. Rim je grad koji svako treba barem jednom u svome životu da posjeti. Sigurno se neće pokajati."

Armin Begić: "Zahvaljujući ovoj nagradi, prvi put u životu sam imao priliku posjetiti Rim. Vidjeli smo mnoge historijske i kulturne znamenitosti. Bilo je to jedno edukativno i ugodno iskustvo."



Elmar Delić: "U Rimu je bilo super, jako velik grad sa puno znamenitosti. Sve je bilo jako dobro organizovano i bez ikakvih problema je sve prošlo. Hvala onima koji su nam pružili priliku da upoznamo prelijepi Rim i nadam se da ćemo imati priliku da sarađujemo i u budućnosti."

Orhan Smajović: "Osim što sam prvi put bio u predivnom i impresivnom Rimu, prvi put sam se vozio i brodom i avionom. Toliko predivnih iskustava u samo pet fantastičnih dana!"

Sanja Šober Vojinović